



Protocol

dalla endischavla seduta dil cussegl da vischnaunca,
venderdis, ils 18 da zercladur 2010, allas 19³⁰ – 21¹⁰ uras
en casa communal

Presidi: Robert Cajacob

Actuar: Ervin Maissen

Presents:

- | | | |
|-----------------------------|---|---|
| a) Cussegl | Clemens Berther
Robert Cajacob
Bernadetta Caminada-Mühlebach
Madlen Deflorin-Spescha
Emerita Flepp-Degonda
Victor Flepp
Martina Gienal-Caviezel | Rita Huonder-Tenner
Jordana Lozza-Desax
Pirmin Lozza
Pader Vigeli Monn
Flavio Murer
Alfred Spescha |
| b) Suprastonza
communala | Dumeni Columberg
Hans Huonder
Cecilia Maissen-Desax | Roger Tuor
Iso Mazzetta |
| c) Canzlist
communal | Andri Hendry | |
| d) Pertsgisas | Heinrich Berther | Giusep Columberg |
| e) Hosps | - | |

Plaid da beinvegni *dil president dil cussegl da vischnaunca.*

"Jeu beneventel vus alla endischavla seduta dil cussegl da vischnaunca dalla perioda d'uffeci 2009/12.

Il davos onns ein plitost stai passivs, quei che pertucca investziuns e novaziuns en nossa vischnaunca. Plaunsiu stuevan nus sedumandar tgei fagein nus falliu, auter ni mender che las vischnauncas ni regiuns vischinontas. Oz sepresenta la situaziun legreivlamein empau auter. Fatschentas, pil pli indigenas e privats investeschan puspei en nossa vischnaunca. Intressants ed innovativs projects ein en realisaziun ni spetgan da vegnir realisai, p. ex. la nova cascharia a Salaplauna, il niev sistem da scaldar a Rieven, il niev cundrez d'energia dalla Corporaziun d'aua „Spina da vin“ a s. Catrina, l'engrondaziun dalla casa da tgira Sursassiala eav.

Speranza sin investziuns astgein nus era far per il territori d'industria a Pignola, sut Segnas e sigl areal dil Hotel Acla da Fontauna. La speranza miera enconuschentamein il davos.

La dumengia vargada ha il suveran dau legreivlamein suatientscha alla damonda da credit per la sanaziun dalla casa communal. Jeu ed aunc biars auters essan bi leds da quella decisiun. Bien engraziament a tut tgi ch'ei s'engaschaus per la caussa e buca il davos al pievel per il sustegn.

La situaziun finanziaria dalla vischnaunca sepresenta aunc adina buca meglier, nus essan denton sin buna via d'era migliurar tec a tec quella situaziun. Quei va secapescha buca senza sforzs ed engaschi da mintgin, seigi quei dalla vart politica ni dalla vart da convischins e convischinas.

Nus astgein denton buca emblidar ch'il suveran ha purschiu maun ed ha acceptau entginas midadas structuralas e buca il davos in brav alzament dil pei da taglia sin entradas e sin schischom. In alzament che tucca mintgin, che fa mal, ch'ei denton staus justificaus quei mument.

Legreivlamein ei oz la situaziun davart las entradas dalla vischnaunca denton semidada empau. Da niev profitescha nossa vischnaunca pli che mai dalla vendita d'energia regenerabla. Il quen communal 2009 siara per ca. in milliun meglier che budgetau. Tut quei ei fetg positiv, denton dat quei success era speranza a vischinas e vischins.

Negin spetga grondas midadas dad oz sin damaun, era buca tier il pei da taglia, denton sco nus s'engaschein per las finanzas da nossa vischnaunca, stuein nus era respectar la situaziun finanziaria da vischinas e vischins.

Che la cumissiun da gestiun e la suprastonza communal ein buca satisfatgs dalla decisiun dil cussegl da vischnaunca arisguard l'adattaziun dallas taxas annualas per il diever dalla canalisaziun e dalla serenera, sco ei vegn fatg menziun el messadi per la tractaziun dil plan da finanzas 2011-2015, ei enconuschent e schizun capeivel. Il daco ch'il parlament ha decidiu aschia ei denton era enconuschents. Bugen havess quel decidiu auter en quella caussa, havess el viu in levgiament per convischins e convischinas en ina outra sparta.

Sco menziunau all'entschatta, marscha actualmein enzatgei en nossa vischnaunca. Nus astgein haver speranza ed esser optimists. Nus astgein denton buca emblidar il singul convischin, ses desideris e ses quitaus.

Gratualziuns:

Bugen senezegiel jeu dalla caschun per gratular a concusseglie Heinrich Berther per la hanorifica reelecziun el parlament cantunal. Nus sperein d'era vinavon saver profitar da sia lavur a Cuera.

Medemamein less jeu gratular a concusseglie Clemens Berther per sia biala reelecziun sco suppleant dil cussegl grond.

Cun la fin dalla perioda d'uffeci havein nus negin mistral pli, denton in vicemistral. Cordiala gratulaziun ad Ervin Caminada per l'elecziun.

Engraziament:

Gerau Hans Huonder seretila cun la fin digl onn current sco gerau. Persunalmein deploreschel jeu quei, haiel denton tutta capientscha per sia decisiun. Dapi biars onns lavura el per il beinstar da nossa vischnaunca ed ha unfriu fetg bia da siu temps liber persunter. Per siu grond e fritgeivel engaschi mereta el in grond engraziament. Jeu giavischel ad el per il temps restont en uffeci vinavon in bien maun e per il futur ensemen cun sia famiglia bia bi temps communabel e tut bien.

Mortoris:

Cun in bien patratg lein nus seregurdar da Carli Carigiet-Halter (Vitg), naschius ils 12 da november 1920 e morts ils 10 da matg 2010; Josef Kreiliger-Meyer (Dulezi) naschius ils 9 d'october 1921 e morts ils 16 da matg 2010; Margrita Huonder-Huonder (Funs-Dado), naschida ils 8 da zercladur 1920 e morta ils 24 da matg 2010.

Nos defuncts ruaussien en pasch.

Gliesta da tractandas

La gliesta da tractandas secloma sco suonda:

1. Protocol nr. 10 - 2009/2012
2. Plan da finanzas 2011 – 2015 (messadi nr. 17-2009/2012)
3. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



1. Protocol nr. 10-2009/2012

President dil cussegl da vischnaunca Robert Cajacob

Il protocol nr. 10 ei vegnius tarmess tier per posiziun. Enteifer ils tschun dis fixai ei vegniu inoltrau neginas propostas per midadas.

Il protocol nr. 10-2009/2012 dalla seduta dils 23 d'avrel 2010 vegn approbaus senza opposiziun.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



2. Plan da finanzas 2011 – 2015: (messadi nr. 17-2009/2012)

President communal, Dumeni Columberg

admetta a votantas e votants in cordial engraziament per l'approbaziun dil credit per la sanaziun dalla casa communal. In special engraziament drezza el als commembers dallas autoritads ch'ei s'engaschai cun tutta forza pil beinreussir da quella fatschenta. A vesta dallas per part fallidas informaziuns che fagevan la curella secapescha quei success buca da sesez. La casa communal vegn buca mo a sepresentar en in niev vestgiu e cheutras dar nova tempra a siu contuorn, ins vegn era ad optimar l'organisaziun interna. Duront il temps da sanaziun vegn l'administraziun a stuer quintar cun enqual disturbi. Vischinas e vischins vegnan medemamein supplicai per capientscha.

President dil cussegl da vischnaunca

La tractaziun dil plan da finanzas vegn structurada sco suonda:

- Informaziun generala davart il plan da finanzas
- Orientaziun davart la finanziaziun speciala
- Tractaziun dil plan d'investiziun

Suenter mintga bloc suonda la pusseivladad da tschentar damondas e da far discussiun.

President communal

La tractaziun dil plan da finanzas ei in ritual annual. Tuttina astga la tractaziun buca daventar ina fatschenta mo formala. Il plan da finanzas ei numnadamein in impurtont instrument per direger la vischnaunca. Il canzlist ha preparau ina presentaziun detagliada. Il plan da finanzas fixescha la basa per il preventiv. El sebase sin il program d'actividad. Perquei setracta ei cheu buca da midadas substanzialas.

Era pil futur drova ei gronda precauziun e prudientscha. Igl ei vinavon necessari da spargnar e da restrenscher las investiziuns. Deplorablamein ha il pievel grischun fiers la nova ulivaziun da finanzas. Quella havess possibilitau ina ulteriura reducziun dil deivet communal e lubiu eventualmein en dus ni treis onns ina reducziun dil pei da taglia. Cun adattar ad uras il pei da taglia ha la vischnaunca da Mustér priu ina prudenta decisiun ella dretga direcziun. Las consequenzas dalla midada dalla lescha da taglia cantunala per las vischnauncas sepresentan per exempel a Cuera, Tavau ni Domat. Leu ein ins vegnius en fatalitads e las autoritads ston encurir pusseivladads per reducir las expensas ni augmentar las entradas.

Tier il plan d'investiziun ha la suprastonza communal fatg las suandontas adattaziuns: las investiziuns per la sanaziun dallas vias astgan buca survargar 1.5 milliuns francs per onn ed il deivet actual astga buca crescher.

Andri Hendry, canzlist communal

Dat – cun agid d'ina projecziun - ina survesta davart ils parameters impurtonts pil plan da finanzas e cumpareglia las finamiras tschentadas cun las cefras che san vegnir contonschidas. Il plan da finanzas vegn fatgs per tschun onns. Ei setracta cheu d'in instrument da planisaziun che survescha per tgamunar la vischnaunca a mesa e liunga vesta. El remplazza buca il preventiv, survescha denton sco basa per preparar quel.

Per preparar il plan da finanzas ein ins partius d'ina carischia annuala dad 1.0 – 1.5%, in alzament real dallas pagas da 0.5% per onn, tscheins per emprests novs da 3.5 – 4.0% e neginas incaricas novas.

Las finamiras tschentadas el plan da finanzas sepresentan sco suonda:

	Finamira politica	Media 2010-2015
Cumpart d'atgna finanziaziun	> 12%	14.82%
Grad d'atgna finanziaziun	> 70%	93.13%
Cumpart grevezia dils tscheins	< 3%	3.53%
Cumpart survetsch da capital	< 15%	16.35%

Aschinavon ch'il pei da taglia fuss buca vegnius adattaus, havess la vischnaunca stuiu quintar pigl onn 2009 cun meinsentradas da frs. 740'000.--. Consequentamein havess quei giu massivas consequenzas sil quen 2009 e sin il deivet communal. Ei fuss stau necessari da reducir las investiziuns el plan da finanzas per la mesadad. Senza novas entradas, resp. reducziun dallas investiziuns vegn ei buca ad esser pusseivel da reducir ils deivets. La documentaziun vegn aschuntada al protocol original.

President communal

Dalla presentaziun seresulta il suandont facit: Il deivet actual da rodund 18 milliuns francs astga buca vegnir augmentaus. Avon che ponderar ina reducziun dil pei da taglia eis ei necessari da reducir il deivet sin 15 milliuns francs. Igl augment dallas entradas da taglia e las novas entradas ord l'energia da participaziun gidan a mantener igl equiliber. Las investiziuns annualas astgan denton buca survargar la summa dad 1.5 – 1.7 milliuns francs. Per saver mantener da maniera optimala l'infrastructura fussen denton investiziuns da da 2.3 – 2.5 milliuns necessarias.

Il deivet actual sto vegnir stabilisau. La varianta presentada para raschuneivla. In ulteriur augment dil pei da taglia ei exlaus. Ina reducziun dil pei da taglia pretendess ina reducziun dallas expensas annualas el quen current da frs. 600'000.--. Quei ei strusch pusseivel. Pia eis ei necessari da reducir il deivet cun restrenscher las investiziuns. In reducziun dallas investiziuns astga denton buca periclitar il manteniment dall'infrastructura communal. Certas vias pretendan mesiras urgentas. La reducziun dil pei da taglia en favur d'in augment dil deivet vegn buca en damonda.

Cusseglier Clemens Berther, president dalla cumissiun da gestiun

La cumissiun da gestiun havess viu bugen, sch'ins havess ils proxims 4 onns saviu reducir il deivet annualmein per mintgamai in milliun francs. Per contonscher quella finamira, havess ins stuiu desister da tuttas investiziuns. Quei fuss buca bien per l'infrastructura communal. Impurtont eis ei denton da buca augmentar il deivet. Perquei eis ei pil mument buca pusseivel da reducir il pei da taglia. Nus essan sin buna via ed ins ei cunscients ch'ei basegna vinavon buna disciplina pertuccont las expensas. La cumissiun da gestiun sustegn la proposta presentadada.

Cussegl da vischnaunca
Desista d'ina discussiun generala.

Finanziaziun speciala

President communal

Per las finanziaziuns specialas valan claras prescripziuns. Il canzlist communal vegn perquei ad orientar surlunder.

Canzlist communal

Recavs specifics vegnan - sebasond sin ina basa legala - impundi per ademplir ina incumbensa publica. Tenor in principi secumprovau ston ils caschunaders purtar ils cuosts ch'els caschunan. La vischnaunca da Mustér enconuscha suandontas finanziaziuns specialas:

- Parcadis
- Canalisaziun e serenera
- Economisaziun dils rumians

In quarta sparta savess il provediment d'aua esser. Quell'incarica ei denton adossada allas corporaziuns d'aua.

Las finanziaziuns specialas sebasan sin prescripziuns federalas, cantunalas e communalas ed il principi dil caschunader. Quei principi vegn sustenius dallas dertgiras.

Quellas spartas ston purtar sezzas. El quen current sepresentan las spartas numnadas sco quens ulivai. Suenten haver cudischau ils cuosts da menaschi, las expensas per amortisaziuns e las entradas ord taxas e contribuziuns vegn il quen ulivaus cun ina entrada ni expensa sut il conto d'ulivaziun ella bilanza. Ils contos d'ulivaziun parcadis e dismessa da rumians ein activai actualmein cun in dabien da frs. 19'838.65 resp. frs. 142'762.65, ferton ch'il conto canalisaziun e serenera sepresenta cun in deivet da frs. 607'599.--. Aschinavon che las entradas ord las taxas annualas e las taxas da colligiazion pon buca cuvieren las expensas e las amortisaziuns annualas, s'augmenta il deivet activau cuntinuadamein. Plinavon eis eis necessari da tscheinsir quei deivet. Senza novas entradas vegn quei deivet a s'augmentar da maniera progressiva. Tonpli ch'igl ei ulteriuramein necessari d'amortisar investiziuns fatgas ella dimensiun da 2.2 milliuns francs.

Gerau Roger Tuor

Fa attents sin la necessitad d'augmentar las entradas per la sparta canalisaziun e serenera. El menziunescha specialmein las grondas investiziuns che spetgan el rom dalla sanaziun da vias mo era investiziuns che sedattan muort il manteniment dalla canalisaziun sin fundament dils resultads dil concept general da drenascha GEP. Sper investiziuns ch'ei exnum necessarias dat ei en quei connex era investiziuns che fan meins prescha, sco las sereneras per Pardomat e Cavardiras. La survesta presentada vegn aschuntada al protocol original.

President communal

L'adattaziun dallas taxas per canalisaziun e serenera ei inevitabla. Las ponderaziuns stadas presentadas el messadi al cussegl da vischnaunca ein aunc adina valeivlas. La suprastonza communal ha giu intercuretge treis variantas e menziunau quellas el messadi. A vesta dalla situaziun finanziaria haveva la suprastonza communal proponiu la varianta optimala. Gia igl onn 2003 han ins viu la necessitad per correcturas, denton han ins vuliu spitgar. Ulteriuramein ha la cumissiun da gestiun visau vi sin la necessitad d'adattar las taxas. Igl onn vargau eis ei stau necessari d'engreviar il conto

d'ulivaziun cun ina summa da frs. 195'000.--, aschia ch'il deivet activau ei s'augmentaus a frs. 607'000.--. En vesta dallas investiziuns previdas s'augmenta il deivet per la canalizaziun e serenera els proxims onns a 2.8 milliuns francs. Ordlunder seresulta ina grevezia annuala da tscheins passivs da frs. 150'000.--. Nus essen pia obligai d'agir. Cun adattar las taxas vegnan tuts proprietaris d'immobillas che caschunan ils cuosts d'infrastructura constrenschi da pagar, era tals ch'ei buca domiciliai a Mustér.

Aschinavon che las taxas vegnan buca dattadas, eis ei da quintar che la summa da finanziaziun crescha entochen la fin digl onn 2015 a rodund 5 milliuns francs ed ils tscheins passivs per quella sparta a frs. 250'000.-- ad onn. La suprastanza communal suttametta questa sera negina proposta, denton ei ella obligada da presentar la fatschenta cun la proxima caschun.

President cumissiun da gestiun

La cumissiun da gestiun sa s'accordar cumpleinamein cun las ponderaziuns dalla suprastanza communal. Evtl. fuss ei stau prudent d'orientar il cussegl da vischnaunca a caschun dalla davosa seduta aschi detagliadamein davart las finanziaziuns specialas.

Cussegl da vischnaunca

Desista d'ina discussiun davart las finanziaziuns specialas.

Plan d'investiziun

3 Cultura e temps liber

Gerau Hans Huonder

Pil Center da sport e cultura ei previu neginas investiziuns pli grondas. Actualmein ein ins vid ponderar co nezegiar las anteriuras localitads dil stradalessen e forestalessen. Per satisfar als basegns dil CSC fuss ei necessari d'impunder ils proxims onns 3 entochen 6 milliuns francs. Da quintar ei ch'ins vegn in mument a stuer far pli grondas investiziuns el scaldament. Quellas ein gia vegnidadas refretgas pliras gadas, schegie ch'il CSC ei vegnius engrondius cun la sala Fontauna e la halla da reiver e ch'il scaldament ha contonschiu sia limita. Ina sanaziun energetica vegn ins era a stuer preveder per la scola nova a Cons.

6 Traffic

610 Vias cantunalas

Gerau Iso Mazzetta

Quest'jamna ha giu liug in'uatga cun ils representants digl uffeci da construcziun bassa pertuccont la sanaziun dalla Via Sursilvana. Ins ei secunvegnius da preparar in project per il tschancun naven dalla Casa Cumin entochen a Sontget.

Per la Via Lucmagn exista in studi. La realisaziun dil project da sanaziun ei aunc buca enconuschenta.

620 Vias communalas

Gerau Iso Mazzetta

Las investiziuns per la sanaziun dallas vias communalas ein vegnidadas plafonadas. En vesta alla situaziun dallas vias eis ei buca aschi sempel da fixar las prioritads.

Sin damonda dalla suprastanza communal ha il Cantun renvieu da surprender la Via Faltscharidas. A vesta dalla schliata situaziun da quella via ha la suprastanza communal decidiu da realisar ladinamein quella sanaziun. Il cussegl da vischnaunca vegn el decuors digl atun a vegnir confruntaus cun las damondas corrispudentas.

Persuenter vegn la sanaziun dalla Via Run – ch'ei medemamein en in miserabel stan – retardada in tec; quei era cun risguard sin las surbaghegiadas che vegnan realisadas actualmein a Latis.

620.501.561 Piazas publicas enteifer il Vitg

Cussegliera Martina Gienal

Tgei projects ein previ sut il tetel piazas publicas enteifer il Vitg?

Gerau Iso Mazzetta

Il preventiv 2010 preveda da realisar ina emprema part da quell'etappa. Ei va cheu per promover in center amiez il Vitg. Las investiziuns vegnan repartidas sin dus onns.

President communal

Aschinavon ch'il cussegl s'exprima buca encunter las investiziuns previdas, considerescha la suprastanza communal ch'il cussegl s'accordi cun las propostas dalla suprastanza communal. Quellas vegnan silsunter risguardadas el preventiv e quei tenor las prioritads stipuladas el plan da finanzas. Consequentamein vegn la Via Faltscharidas sanada egl onn proxim. La fatschenta vegn suttamessa proximamein al cussegl da vischnaunca.

7 Ambient

Gerau Roger Tuor

Sper las investiziuns gia dilucidadas pli baul, eis ei necessari d'anflar ina sligiazion per ina deponia da material. En connex cun las finanziaziuns specialas eis ei donn ch'ins sa buca colligiar las differentas spartas ina cun l'autra. Forsa ch'ei fuss aschia pusseivel d'anflar ina sligiazion per la finanziaziun dalla canalisaziun e dalla serenera.

8 Economia

Gerau Hans Huonder

Ils projects da vias d'uaul sentardan empau. Perquei han ins decidiu da reducir il proxim onn il credit per frs. 400'000.--. La via el contuorn dalla Schetga da Madernal sa buca vegnir realisada per la summa previda. Perquei drova ei ulteriuras retschercas. Pertuccont la Via Run ein ins vid projectar singuls tschancuns che duein vegnir sanai.

830.501.00 Senda Salaplauna

Cusseglia Flavio Murer

Tenor plan da finanzas duei la senda vegnir projectada uonn e lu realisada ils proxims onns. Cura vegn quei project presentaus al cussegl?

Gerau Iso Mazzetta

Ina part dalla senda ei vegnida realisada ensemen cul Center sursilvan d'agricultura. Perquei intent han ins postau pals cun inscripziuns che dattan informaziuns davart las activitads dall'agricultura. Il project ei vegnius inziaus entras Enjoy Switzerland e sebasea per gronda part sin giavischs formulai el maletg empalont. Cura ch'il project vegn presentaus ei aunc buca enconuscent.

President dil cussegl da vischnaunca

Dat la pusseivladad da revegnir. Da quella vegn buca fatg diever.

Votaziun

Cun 13 encunter 0 vuschs e neginas abstenziuns pren il cussegl da vischnaunca enconuschientscha dil plan rullont da finanzas 2011 – 2015.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen



3. Ura da damondas (conform ad art. 44 dil regulativ da fatschentas)

President dil cussegl da vischnaunca

Igl ei vegniu inoltrau duas damondas.

Cussegliera Martina Gienal

Han ins gia menau contractivas cun la vischnaunca da Medel pertuccont la cumpart als cuosts dils scolars dil scalem superieur?

Gerau Hans Huonder

Cun la vischnaunca da Medel ha aunc giu liug neginas contractivas pertuccont ils scolars dil scalem superieur. Quei succeda el proxim temps.

Cusseglia Pirmin Lozza

Ha inoltrau in entir tschuppel da damondas pertuccont il svilup dalla vischnaunca da Mustér. Tenor art. 44 dil regulativ da fatschentas ei l'ura da damondas denton destinada mo per ina semplia damonda ed ina cuorta risposta. Las damondas inoltradas san vegnir presentadas en fuorma d'ina interpellaziun che la suprastanza communal sto rispunder a scret enteifer treis meins.

Gerau Iso Mazzetta

Pren posiziun pertuccont la zona da baghegiar per indigens a Caschuarz. Quella ei vegnida approvada ils 26 da matg 2009 dalla Regenza grischuna ed entrada igl emprem da settember 2009 en vigur. Per quella zona sto la vischnaunca relaschar ina reglamentaziun davart la relaziun denter habitaziuns primaras e secundaras, sco era in plan da quartier. Sco basa per elaborar il plan da quartier duei igl emprem vegnir realisau in concept da surbaghegiada. Ils 23 d'avrel 2010 – suenter ina procedura da submissiun – ha la suprastanza communal surdau ad in biro d'architectura l'incarica da sviluppar in tal concept. Gest oz ha giu liug in discuors davart quei concept per sclarir differentas damondas. Cun risguardar tuttas proceduras eis ei da quintar ch'il plan da quartier seigi avon maun sil pli tard igl atun 2011, aschia ch'ins savess entscheiver cun las lavurs sil pli baul la primavera 2012.

Cusseglia Pirmin Lozza

Sa buca capir che la preparaziun da quei plan da quartier basegna ton temps. Eis ei buca pusseivel d'accelerar las lavurs per che la planisaziun sappi vegnir terminada cun la fin digl onn 2010?

Gerau Iso Mazzetta

La suprastanza communal ei senza interessada d'accelerar quellas lavurs. Denton basegna ei in bien concept per saver surbaghegiar la parcella. Igl ei pusseivel ch'ei basegna evtl. per la reglamentaziun dalla relaziun denter habitaziuns primaras e secundaras ina votaziun dil pievel, cun approvaziun entras la Regenza.

President dil cussegl da vischnaunca

Cusseglia Clemens Berther ha inoltrau in postulat concernent metter a disposiziun spazi per realisar bargias da lenna.

La proxima seduta (excursiun) dil cussegl da vischnaunca ha liug venderdis, ils 27 d'uost 2010. Il program detagliau suonda.

Cussegl da vischnaunca Disentis/Mustér
Il president: Igl actuar:

Robert Cajacob

Ervin Maissen

Disentis/Mustér, ils 3 da fenadur 2010

Cus0012_11.docx